

**LEGAZPIKO “HAURREN UDA IKASTAROA” UDALEKU IREKIETARAKO
BEGIRALEAK HARTZEKO OINARRIAK
2020**

1. Deialdiaren xedea.

Oinarri hauen helburua da Legazpiko Udaleko Euskara Sailak antolatzen duen “Haurren Uda ikastaroa” izeneko udaleku irekietarako begiraleen aldi baterako kontratazioa arautzea.

Kontratuak uztailaren 1etik 24ra (biak barne) iraungo du eta lanaldia Udalak ezarriko du aipatutako programari aurre egiteko beharrak kontuan hartuta.

Ordainsaria: Legazpiko Udaleko ordainsarien taularen 5. maila.

Erreserbako zerrenda baten parte izatera pasatuko dira kontratatu behar direnak baino lagun gehiago badira. Kontratazioak egiterakoan, uko edo baja egoera baten aurrean erabiliko da zerrenda hori.

Langileen Estatutuaren Legearen testu bateratua onartzen duen urriaren 23ko 2/2015 Legegintzako Errege-dekretuaren 40.1.d) xedapenari jarraiki, langileak lan kontratua sinatu eta gero uko egiten badu, 15 egun naturaletako aurrerapenarekin jakinarazi beharko dio Udalari. Legazpiko Udalak ukoak penalizatu ahalko ditu hurrengo urteetako begiraleen hautaketa prozesuetako puntuazioetan.

2. Prozesuan parte hartzeko baldintzak.

Onartua izateko eta hautaketa prozesuan parte hartzeko baldintza hauek bete behar dira:

1. 18 urte beteta izatea, izena emateko epea bukatzen denerako.
2. Aisialdiko begirale titulua izatea.
3. Euskaraz ongi ulertu eta hitz egitea.
4. Funtzioak behar bezala betetzeko eragozpenik ez izatea, gaixotasun edo muga fisikoen ondorioz.
5. Inolako Administrazio Publikoren edo Autonomia Erkidegoetako konstituzio- nahiz estatutu-organoen zerbitzutik diziplina-espeditente bidez baztertu gabea izatea eta funtzio publikoak betetzeko ezgaituta ez egotea.
6. Sexu-izaerako delituengatik aurrekari penalik ez izatea.
7. Kontratazio hau ez da bateragarria izango beste lan kontratu edo funtzionario izendapen batekin.

3. Eskabideak aurkeztea.

Epea: ekainaren 15etik 19ra.

Lekua: Legazpiko Udaleko Herritarren Arreta Zerbitzuan (HAZ). **Orduetgia:** 8:00etatik 15:00etara.

Halaber, eskaerak posta-administrazioetan aurkezteko aukera izango da, urriaren 1eko Administrazio Publikoen Administrazio Prozedura Erkidearen 39/2015 Legeak, 16.4 artikuluan araututakoari jarraiki. Horrela egiten bada, eskaerak Udaleko alkate-presidenteari zuzenduko zaizkio kartazal ireki batean, posta bulegoko funtzionarioak data eta zigilua jar diezaion, eskaerak aurkezteko epearen barruan. Dokumentuak posta-bulegoan aurkeztutako eguna Erregistro Orokorreko sarrera-data gisa hartuko da baldin eta baldintzak betetzen badira.

4. Aurkeztu beharreko agiriak.

- Eskaera orria beteta (www.legazpi.eus Web gunean zein Legazpiko Udaleko HAZen eskuragarri).
- Aisialdiko begirale titulua (iaz ekarri zutenek ez dute berriz aurkeztu behar izango).
- Euskara mailaren ziurtagiria.
- Eskaeran aipatutako merezimenduak egiaztatuko dituen beste edozein agiriren kopia (iaz aurkeztu baziren, ez dira berriz aurkeztu beharko).
- Azken urteko lan-ibilbidearen agiria (2019ko ekainaren 1etik izena emateko epe artekoa). Agiri hau www.seq-social.es helbidean edo 901 50 20 50 telefono-zenbakira deituz eskuratzen da.

5. Kalifikazio-epaimahaia.

Epaimahaia ekainaren 22 edo 23an bilduko da aurkeztutako merezimenduak baloratzeko. Honako kideek osatuko dute epaimahaia:

- Lehendakaria: Euskara saileko zinegotzi ordezkaria
- Kideak: udaletxean ordezkartza duten talde politikoetako ordezkari bana
- Idazkaria: euskara teknikaria

6. Izangaiak onartzea.

Eskabideak aurkezteko epea amaituta, onartutako eta baztertutako izangaien behin-behineko zerrenda argitaratuko da Legazpiko Udalaren web orrian (www.legazpi.eus).

Baztertuak izan direnek bi egun balioduneko epea izango dute, zerrenda web orrian argitaratuko den unetik bertatik hasita, baztertuta geratzea eragin duten akatsak edo ez-egiteak zuzentzeko.

Behin-behineko zerrenda automatikoki behin betikoa bihurtuko da, baldin eta erreklamaziorik aurkezten ez bada.

7. Hautaketa-prozesua.

Ondorengo irizpideei ezarriko zaizkien puntuazioen arabera, hautagai bakoitzaren puntuazioa aterako da eta horren arabera lortuko da kontrataziorako erabiliko den hurrenkera. Puntuagarri den guztia egiaztatu egin beharko da puntuatua izan dadin.

*** Titulazioa:**

- Aisialdiko zuzendari titulua:

- ✓ Euskaraz burutu bada: 6 puntu
- ✓ Beste hizkuntza batean burutu bada: 5 puntu.

- Aisialdiko begirale titulua:

- ✓ Euskaraz egin bada: 2 puntu

*** Euskara:**

- C1 maila: 3 puntu.
- C2 maila: 4 puntu.

*** Lan-esperientzia:**

- Udaleku itxietan zuzendari lanetan: 15 eguneko puntu 1, gehienez 4 puntu.
- Udaleku itxietan begirale lanetan: 15 eguneko 0,5 puntu, gehienez 2 puntu.
- Udaleku irekietan zuzendari lanetan: udaleku bakoitzeko puntu 1, gehienez 4 puntu.
- Udaleku irekietan begirale lanetan: udaleku bakoitzeko 0,5 puntu, gehienez 2 puntu.

*** Herritartasuna:**

- Legazpikoa izatea eta bertan bizitzea: 4 puntu.

* Langabezia: aintzat hartuko da azken urtean (2019ko ekainaren 1etik izena emateko epea hasi arte) lanik gabe egondako denbora:

- lanean 60 egun baino gutxiago eman dutenek 3 puntu jasoko dituzte.
- lanean 61 egun baino gehiago eta 120 egun baino gutxiago eman dutenek 2 puntu jasoko dituzte.
- lanean 121 egun baino gehiago eta 180 egun baino gutxiago eman dutenek puntu 1 jasoko dute.

8. Izangaien zerrenda.

Izangai bakoitzaren azken puntuazioa hautaketa-prozesu osoan lortutako puntuen batura izango da.

Berdinketa izanez gero, ordena ezartzeko honako irizpide hauek hartuko dira kontuan, hurrenez hurren:

1. Herritartasuna: Legazpikoa izatea lehenetsiko da.
2. Ikasketak: gizarte arlokoak eta maila gorenekoak lehenetsiko dira.
3. Langabezia: langabe denbora gehien egon dena lehenetsiko da.
4. Begirale titulua: euskaraz egin izana lehenetsiko da.
5. Begirale titulua: lehenago eskuratu izana lehenetsiko da.

Eta irizpide horiek aintzat hartu eta gero, hala ere, berdinketak jarraituko balu, Epaimahaiak zozketa egingo luke.

Hautaketa bukatu ondoren, Epaimahaiak lortutako puntuazioaren ordenaren arabera zerrenda argitaratuko du Legazpiko Udaleko web orrian, eta onarpen proposamena igorriko dio eskudun organoari.

9. Izangaien betebeharrak.

- Euskara izango da begiraleen lan eta zerbitzu hizkuntza.
- Begiraleek prestakuntza-ikastaro bat egin beharko dute **ezinbestean**. Ikastaroaren eguna aurrerago zehaztuko da.